

保定府志

第二十五冊 卷六十一至
孝義 隱逸 流寓

保定府志卷六十一

列傳十五

孝義一

後漢

酈炎字文勝范陽人

今定興

酈食其之後也有文才解音律言論

給捷多服其能靈帝時州郡辟命皆不就嘗作詩二篇以見志
炎後風病慌忽性至孝遭母憂病甚發重死時年二十八尚書

盧植為誅讚以昭其懿德

後漢書

晉

許瑤之高陽人為建安郡丞行廉而好賑人之急時郭原著孝
行瑤之還里特以緜一斤遺原原不受瑤之乃自往曰歲過寒
聊以此奉若母耳原拜而受之

高陽縣志

北魏

石文德中山蒲陰人也

今完縣

有行義真君初縣令黃宣在任喪

亡宣單貧無菽親文德祖父苗以家財殯葬持服三年奉養宣

妻二十餘載及亡又衰絰歛附率禮無闕自苗逮文德刺史守

令卒官者制服送之五世同居閨門雍睦與梁州趙令安等詔

並標榜門閭

北史節義傳

鄭羆高陽人有義行范陽盧度世以崔浩事棄官逃匿羆家使

者囚羆長子將加箠楚羆戒之曰君子殺身以成仁汝雖死勿

言子奉命被拷掠至以火焚其體因以物故卒無所言度世得

免

大清一統志

許絢字伯禮頗有業尙閨門雍睦三世同居吏部尙書李神儁

嘗稱其家風自侍御史累遷尙書左民部司徒諮議參軍修起

居注後拜大中大夫興和初卒年四十七贈使持節都督冀瀛

二州軍事征東將軍吏部尚書冀州刺史

魏書許彥傳

按許絢為高陽新城人許彥曾孫彥傳見仕蹟

梁

成景儁字超范陽人也

今定興

祖興仕魏為五兵尚書父安樂淮

陽太守梁天監六年常邕和殺安樂以城內附景儁謀復讎因殺魏宿預城主以地南入普通六年邕和為鄱陽內史景儁購人刺殺之未久重購邕和家人鳩殺其子弟噍類俱盡武帝義之每為屈法景儁家讎既雪每思報効後除北豫州刺史侵魏所向必推其智勇時以比馬仙琕兼有政績見懷北豫州吏人樹碑紀德卒諡曰忠烈云

南史孝義傳

許道幼高陽人官至員外散騎侍郎常以母疾遂覽醫方因而

究極時號名醫誠諸子曰為人子者嘗藥視膳不知方術豈謂
孝乎由是遂世相傳授仕梁位員外散騎侍郎

北史許智藏傳

宋

鄭彥圭順安軍人

今高陽

八世同居淳化二年詔旌門閭

宋史孝義傳

榮恕憫

避諱改寫

歸信人

今雄縣

兄弟異居積年大中祥符時恕憫家

榆樹兩本自合恕憫感其異復相聚鄉人稱雍睦

大清一統志

金

時承諫新城人天會間大饑散粟米巨萬全活者以萬計嘗修
橋數十私券悉焚之子孫三十餘人多顯耀僉以為種德之報

新城縣志

按承諫立愛父金史作承謙李宴榮國時公神道碑銘作
承諫今從之立愛卒於天眷三年年八十二則天會間饑
承諫不應尚在安得有賑貸事乎况李宴時公神道碑銘
云父諱承 積累巨萬發倉貸人每折其券負郭沮洳常

阻行路創石為梁人得平步善慶攸鍾是生我公則修橋
散粟之事在立愛未登第以前可知縣志不知何本天會
二字疑有誤
姑存以俟考

李增李春饒於貲財夾河隄決憫鄉里苦於水患乃解囊修築

之水不為災人咸德之

安州志

按舊志李增易州人與弟李春竭資修市
村隄至今利之與此事同而地異俟考

孟振文清苑人順天軍節度使某之子幼孤及長求父遺櫬於

河南登封負以歸母喪終疽發背卒

陵川文集

元郝經孟振文詩簪笏箕裘出鼎腴泥塗誰使擲瓊瑤負
骸千里還墟墓泣血三年損敝廬聞說朱衣畏金石豈知
白粥亦癰疽羈孤撩亂號
嫠婦淚浸牀頭幾册書

劉珏縣志作珪滿城人勤學好禮孝親友弟邑人以長者稱父卒與

諸兄負土築臺於墓朝夕登哭守三年而歸鄉人賢之

舊志

郭興孫唐縣人慷慨好善尤多義舉泰和四年與同邑左松壽

各捐私鏹百萬倡修學宮廣增舊制併繪四配真像躬督其役

六閱月落成之

唐縣志

元

郭祥高陽人母韓氏病祥百計求醫而病不痊祥乃割股為羹

以進母食之遂愈

舊志參高陽縣志

劉德和雄州人

今雄縣

達朵兒之變有二十三人避徙他邑捕獲

將斬以徇德和力辨其無辜得免歲歉人剝樹以食德和漁易

河取廩米雜烹之以給餓者活數千人

舊志

魏敬益字士友容城人居母喪哀毀骨立素好施與有婚嫁夫

時者出資財助之歲饑為糜以食老弱買四莊村之田十頃環

村之民皆不能自給敬益憫之呼莊民而語之曰吾尚買若等

業耳不謂若等遂無以聊生吾何忍願歸若等田眾不敢受強

之後可眾白諸有司以聞於中書丞相賀太平歎曰世乃有斯

人哉舊志參元史

梁師安容城人學於劉靜修輕財重義捐資一萬八千緡創建

孔子廟及齋舍延名士以誨後進置腴田以充廩餼時論高之

舊志

耿德温保定人親喪廬墓三年同郡張行一賈秉實張昂俱以

廬墓聞元史孝友傳敘

按安肅縣志賈秉實字思誠親喪廬墓二年免馴於側有司白其事旌之黑山村有秉實墓又按元史孝友傳敘事親篤孝有保定邢政舊志云涑水人今不錄

劉智高陽人職百戶親遭疾醫弗效智乃操刀剖腹割肝療之

親病乃瘥智亦無恙泰定中進士劉士義紀其事於墓石舊志參高

陽縣志

田喜清苑人元兵破保州下令老者盡殺喜欲代父死潛伏父
 軀以兩手據地俛而延頸元兵未暇省閱項腦中兩刀而死夜
 半復甦後二日令再下無老幼盡屠工藝不殺時喜被選行次
 安肅聞父死逃回求屍得之負以涉河冰傷脛血出發母塚下
 尸塞之而還舊志

郭希泰清苑人孝友著稱嘗營樓居或謂當構二楹以便昆仲
 分居希泰謝曰君言私矣天倫可容私乎聞者歎服舊志

王綱新安人師事劉靜修居母喪哀毀過禮父病綱日夕憂戚
 致疾卒舊志

穆茂束鹿人父沒三年不脫經帶不進鹽蔬每旦至暮拜跪哀
 哭未嘗少閒同上

王庸雄州歸信人今雄縣事母李氏以孝聞母有疾夜禱北辰至

叩頭出血母疾遂愈及母卒哀毀幾絕露處墓前旦夕悲號一夕雷雨至鄰人持寢席往蔽之見所坐臥地獨不霑溼咸歎異而去復有蜜蜂十隊來止其家歲得蜜蠟以供祭祀

元史孝友傳

呂顯宗字克耀安州人自元以前世居高陽之西河村集賢社資產豐饒宗族繁衍傳數代至顯宗仕至三品因所居自號集賢居士平生好善樂施予嘗導滹沱河水以利民人稱為呂家

河曾孫雯官至兵部左侍郎

舊志參安州志

張克讓字允恭清苑人天資秀異受業趙省齋之門博極羣書不事章句初意欲取功名及父卒棄去故習專以繼述為事生平敦義行有德惠於族里將卒謂家人曰人之為學苦節唯在死生之際死而不亂學之力也言訖而逝

雍正通志

明

李顏德安州人博學明經孝義著聞洪武中被薦任本郡唐縣

令安州志

王興新城人母病嗽醫禱莫療乃臥冰白溝河上籲天如是者

三年母病以瘳舊志洪武時旌大清一統志

胡斌雄縣人洪武末雄被土寇劫掠枕骸蔽野行者心悸斌躬

荷荆筐盛尸別男女為叢塚以葬之越六旬而蕝事雍正通志

顧仲禮唐縣人早喪父事母至孝仲禮諳堪輿術得酒食必先

遺母母亡廬墓三年舊志

按清苑縣志亦載仲禮孝親事蓋因府學孝子祠有仲禮遂誤為清苑人

王恭安肅人洪武時以孝旌表舊志

董得祿雄縣人喜施好禮置義塾以教鄉人子弟多所成就院

有古井傭人浚治之掘錢盈窟得祿曰生子願忠孝安用阿堵

物耶遂舍不治

舊志

劉甯容城人耕釣為業歲不熟鬻幣遍野持器築埋之餓殍滿道取魚救濟之邑人扈文進老而無子延養之五年禮敬不替及疾作為之療治不痊而卒擇地以葬

舊志

所遺金帛悉緘付其

壻邑令作義士歌紀其事

容城縣志

李讓新城人洪武二十年三月遭兵民罹鋒刃枯骨盈野讓不忍於心捐地一區為義塚逐日尋埋齒骼人相呼為李家塚

新城

縣志

劉輔博野人永樂時赴京白其父寃適山西長子縣令艾在繫輔與其子瑛交好瑛歸省母以父為託父瘦死輔傾囊殮殯之瑛來痛哭拜謝約為兄弟後以子吉貴封太師

舊志

按縣志劉潔永樂時從征東昌北軍過滋水多為居民所殺命千戶盡殲其民潔為嚮導恐傷無辜徐至其處民多

逃匿全活甚眾又以裴徵為姪幸而得生
後徵為指揮事潔如父潔之子即輔也

李觀安肅人庠生正統中報効授大同衛經歷致仕歸課子讀

書敦篤義行鄉里重之舊志

邊靖慶都人太學諸生大清除廣甯衛經歷性至孝父得危

疾靖嘗糞憂悶父沒哀毀幾絕及葬負土成墳廬墓六年環植

以樹歲旱樹枯靖日汲水灌之俄有泉湧出道旁灌溉克給事

聞詔旌其閭舊志參雍
正通志

張瑛完縣人任大甯都司指揮僉事母趙氏年七十餘患傷寒

刲股以進患癰疽吮膿三次尋愈舊志

李鑰完縣人任歷城訓導母張氏年八十七病米漿不入口鑰

禱於藥王廟得靈丹一粒捧而歸母服之頓起延二歲有司異

其事奏旌之完縣志

田如京完縣舉人任黃縣知縣事父孝父以進士任霸州兵憲謝病歸里患寸白蟲每下百餘京輒吞之蒞任未久切於思親解綬歸家貧如洗其子敦儉敦僑亦以孝稱孫見龍善事繼母人稱爲一門衣冠累世孝友云

舊志參完縣志

徐恭博野人灌園道左偶一人至攜大袋置樹下飲水遺之去抵暮方覺號泣奔尋恭偶不在未之見年餘復過飲水語及曩年失銀三百兩恭詢之確出而還之其人拜謝願留其半恭曰半何如全卒不受其人祝曰願君子孫昌盛恭之孫鸞鳳同登鄉薦曾孫行成進士官河南布政使歷世科第不絕後人豎碑於井傍曰還金井

博野縣志

黃鍾慶都人庠生勇敢善騎射正統閒屢立峻功任陝西都司爲人孝友善於持家長幼男婦無閒言事聞詔旌其門曰六世

同居望都縣志

趙鑛清苑人正統時歲歉鑛出麥豆五百餘石助賑有司以聞

朝廷嘉之勞以羊酒舊志

蕭元音容城人武舉性至孝母病醫藥不效夜禱北辰割股與

藥同進遂瘳容城縣志

李忠容城人割肉愈親同上

趙廷貴容城人母病不起割股以奉母病遂愈同上

孫祚隆容城人祖父母死京邸四十餘年隆遵父遺囑抵京徧

覓備極艱辛後得之扶櫬歸安厝祖塋同上

魏國梁容城人七歲知敬母每食必讓而後舉箸十一歲被擄

去拒家數百里一夕夢神呼之走一夜抵里同上

宋鎰容城人庠生四歲而孤母孫氏堅苦撫之成立迨母歿鎰

廬墓側朝夕哭拜竟卒於廬子允詮痛父死於孝亦廬墓三年

同上

蕭玉藻容城人父病日侍左右目不交睫湯藥必嘗及歿哀毀

骨立廬墓三年母沒亦如之

同上

韓雲靄容城人庠生母患瘋癱十八年扶掖起居飲食便弱皆

所躬親未嘗暫離

同上

陳濬容城人庠生母卒結廬墓側

同上

楊文祥蔚明郭文學張童愛劉喜泰田吉昌夏勇宋雨化王鏡

俱割股愈母

同上

郭明新城人選貢任山東曲阜訓導迎二親於宦邸朝夕承歡

無倦色後親思故里告歸母卒廬於墓側祥感烏免

新城縣志

郭曉新城人父歿廬於墓側早晚拜獻

同上

趙祿定興人以資雄里并有長者風人稱爲趙君子有惡少使酒詈之祿扃戶不出已更持酒謝曰得毋勞乎其人太慙正統六年饑以家廩七百五十石助賑事聞旌表

舊志

劉景祥自高陽徙居郡城從塾師畢生學歲大疫畢生闔門病人皆畏避景祥與其妻持湯藥起居且抱其幼男女徧詣乳哺始終不怠畢舉家全活鄉里義之以子恩貴封戶部員外

舊志

于鷗號舉齋安州人孝友性成兄弟旣析箸後有家業中落者割所業更給之戚黨婚喪不舉數轉貸相俵助鄉人稱爲古君子過其廬而式焉以子貴封資政大夫以孫嗣登貴贈刑部右

侍郎

舊志

鹿府定興人多隱德里有惡少詈之府閉門至逢義事則勇爲恤人之難完人之婚鄉黨咸頌其美

同上